

Акафист

преподобномъ и богоносномъ отцѣ нашемъ Иосифѣ старцѣ Оптинскомъ

Кондак 1

Избранному угоднику Божией Матери и послушания теплому рачителю, богомудрому оптинскому старцу Иосифу похвальная принесем песнопения, яко да избавит нас от всякия беды и напасти и наставит на стези правыя вопиющих ему любовь: Радуйся, Иосифе, Божией Матери любимиче блаженный.

Икос 1

От юности твоя отче преподобне, играм не внимал еси младенческим, но все желание души твоя в небесное направив, сего ради явися ти Богородица на облаце, назнаменуя, яко угодник Ея будеши от юности своей. Темже сицевому явлению чудящися, похвальная тебе поем:

Радуйся, отрочище, Божией Материю избранное;
Радуйся, родителей твоих преславное величание.
Радуйся, благочестивое веры процветение;
Радуйся, плоды явивый богопознания.
Радуйся, отроком прекрасный образ подражания;
Радуйся, целомудрия крин благоуханный.
Радуйся, яко из уст младенческих Бог тобою похваляется;
Радуйся, яко от юности твоей Богородица прославляется.
Радуйся, Иосифе, Божией Матери любимиче блаженный.

Кондак 2

Силою свыше осенен был еси благодатию Пресвятаго Духа, еже обучи тя прилежно не внимати обольщениям лукаваго духа, сего ради от мирских красот яко от умет отвратился еси и стопы твоя поставил еси на иночестем пути, поя Богу: Аллилуиа.

Икос 2

Из мира изшел еси, яко от рабства фараоня, и Богу в ризе девства твоего предстал еси, темже яко втораго и прекраснаго Иосифа ты похваляем и целомудренней душе твоей поем: Радуйся, духовнаго девства избранный сосуде;

Радуйся, чистоты и целомудрия верный супруге.
Радуйся, яко душу свою уневестивый Христу Жениху;
Радуйся, яко тело твое облечл еси в нетления чистоту.
Радуйся, яко копием воздержания пробол еси змия;
Радуйся, яко достигл еси Ангельския чины.
Радуйся, чаша Божественныя любви, полна;
Радуйся, еюже напаяеши чада твоя.
Радуйся, Иосифе, Божией Матери любимиче блаженный.

Кондак 3

Яко денница пресветлая в Оптину пустынь притекл еси, Иосифе, идеже богосветлый Амвросий на тверди церковней возсия, иже во объятия свои ты прият отеческия и добродетельными лучи облиста, Богу благодарне воззав: Аллилуиа.

Икос 3

При исходищах премудрости старчестей водворился еси, отче Иосифе, при ногу Амвросиеву тридесят лет пожив. Темже по стезям любомудрия старца твоего ходити изволил еси, к нимже и нас направи, вопиющих тебе сия:

Радуйся, благопослушное чадо отеческаго предания;
Радуйся, любомудрый учениче священнаго писания.
Радуйся, Амвросиевых молитв плод богодарованный;
Радуйся, оптинскаго старчества преемственная славо.
Радуйся, образе любви сына к своему старцу;
Радуйся, наследниче даров богоноснаго аввы.
Радуйся, яко благопокорением разоривый демонския твердыни;
Радуйся, яко благоволением соратовал со Ангельскими силами.
Радуйся, Иосифе, Божией Матери любимиче блаженный.

Кондак 4

Подвигом добрым изволив подвизатися, отче преподобне, пение, бдение, молитву и пост, аки оружие непобедимое восприим, козни демонския, аки паучину, растерзал еси, преблаженне Иосифе, Богу победную воспел еси песнь: Аллилуиа.

Икос 4

Видяще святое твое о Бозе преспеяние, богомудрый Амвросий в таинники своя тебе избра, не токмо дарми ты обогати сыноположения, но и паству свою тебе вручи, мы же, пастырским твоим окормившися водительством, благодарно тебе поем:

Радуйся, мысленных волков от стада Христова отгнание;
Радуйся, словесных овец святоотеческое воспитание.
Радуйся, богомудрыя паствы твоя окормление;
Радуйся, усугубивый старческое на тебе благословение.
Радуйся, яко послушанием явивый о Бозе быстрое преспеяние;
Радуйся, яко сотаинник был еси Амвросиевых откровений.
Радуйся, яко в меру отца твоего достигл еси;
Радуйся, яко о немже дерзновение пред Богом возымел еси.
Радуйся, Иосифе, Божией Матери любимиче блаженный.

Кондак 5

Божиим смотрением болезнь смертная нападе на тя, обаче не ко смерти бысть сия, но ко славе Божией. Крыла бо схимы великия на болезненнем одре приял еси, темже обновился еси Духом яко орля, поя избавителю Богу: Аллилуиа.

Икос 5

Егда на болезненнем одре лежащу ти, отче богоносе, Сама Пречистая Дева Богородица прииде к тебе и укрепи тя в подвизе, словеса изрече сладчайшая: Потерпи, любимиче Мой, немного еще, – темже, чудящися о таком к тебе Божией Матери смотреии, со страхом и любовью тебе зовем:

Радуйся, от младенства избранный Божией Матери любимче;

Радуйся, Еюже от одра смертнаго возставленный.

Радуйся, образе пламенеющей любви к Божией Матери;

Радуйся, непостыдный пред Ней о нас ходатаю.

Радуйся, монашеских чинов невестоводителю;

Радуйся, под покровом Богоматери их предводителю.

Радуйся, яко невест Христовых вручивый Богоматери;

Радуйся, обители Шамординския духовный воспитателю.

Радуйся, Иосифе, Божией Матери любимиче блаженный.

Кондак 6

На небеса восход души своя богомудрый Амвросий устроая, яко Илия колесницу добродетелей себе впряженну стяжав, на нейже восходя, яко милоть, благодать любви своя тебе оставив, в нюже облеклся еси, сугубейше Богу благодарне возвав: Аллилуиа.

Икос 6

Скитом оптинским богомудрое восприим управление по завету старцев оптинских водити потщался еси монашестии стада, темже, благодать старческую на тебе зряще почивающую, овцы словесныя единогласно возваша тебе:

Радуйся, по старце твоём достойный преемниче;

Радуйся, Амвросиевых даров наследниче.

Радуйся, яко прозорливыма очима зревый тайны сердечныя;

Радуйся, яко исповеданием врачевавый язвы душевныя.

Радуйся, богомудрыми советы к небеси восход указавый;

Радуйся, обличительными словесы от греховных уз разрешавый.

Радуйся, оптинскаго старчества светлое зеркало;

Радуйся, утешение богато всем подаваяй.

Радуйся, Иосифе, Божией Матери любимиче блаженный.

Кондак 7

Бурю страстей преминал еси на легцем корабле послушания, ветрилом окормляем молитвами старцев твоих, во отишие безстрастия достигл еси благодатию Божией охраняем. Темже убо отче изми и нас молитвами твоими от потопа греховнаго, да спасающему тобою Всещедрому Богу благодарне вопием: Аллилуиа.

Икос 7

Яко град верху горы стоя, тако бысть душа твоя верою утверждена в Господе, и яко светильник во тьме светяй, тока бысть совети твои приходящим к тебе за помощью. Сего ради сбытие словес Евангельских на тебе зряще, похвальная тебе зовем:

Радуйся, камень смирения положивый во основание здания добродетелей;
Радуйся, камнем тем сокрушивый главу змия миродержца.
Радуйся, град душевный устроивый по образу Горнего Иерусалима;
Радуйся, в немже не бе храм, но Господь его храм и светило.
Радуйся, светильник разсуждения выну имея горящий;
Радуйся, имже от бед спасая к тебе приходящая.
Радуйся, твердое от искушений верным прибежище;
Радуйся, от треволнений душевных светлейшее разрешение.
Радуйся, Иосифе, Божией Матери любимиче блаженный.

Кондак 8

Свет пречуден с небес тебе облистав, отче Иосифе, егда на молитве умильно предстояв, виден бысть яве твой лик светозарен и радостен. Темже чудящися таковой благодати, на тебе почивающей, Богу, дающему молитву молящемуся, вопием: Аллилуиа.

Икос 8

К Богу приблизився непрестанным молением и причастием обожаем яко светильник Божественен был еси, чудодействы светя, сего ради просвещешя житием твоим отче богоносе, светлоплодовитыми сотвтри ны, поющия тебе сия:

Радуйся, светозарное Церкви рустей сияние;
Радуйся, непоколебимое благочестия утверждение.
Радуйся, премудрости Божественной возглаголение;
Радуйся, суеты мирстей оглаголение.
Радуйся, Светом Божественным с небеси облиставыйся;
Радуйся, земномудрствующих нас просвещаяй.
Радуйся, яко наставил еси на спасительныя стези заблуждающих;
Радуйся, яко тайны Божественныя верным открываеши.
Радуйся, Иосифе, Божией Матери любимиче блаженный.

Кондак 9

На висоцем престоле разсуждения утвердил еси свой ум, Иосифе, и порфирию целомудрия, яко одеждою царскою, одеаяся, нов Иосиф Прекрасный явился еси, богомудре отче, и над стратями яко той над Египтом царствовав. Сего ради боговедения хлебами напитай чада твоя, и от страстного избави пленения, да благодарно славим Христа, вопия Ему: Аллилуиа.

Икос 9

Сердце милостивое стяжал еси отче Иосифе, яко требующим твоея помощи усердно благотворил еси, овем убо подая вещественную милостыню, овем убо невестественную, яко чудодейственную силу. Темже свыше богатящися твоей помощью даже и доныне, благодарный ти приносим глас:

Радуйся, Христа щедродательная десница;
Радуйся, Богоматерь похваляющи красныя уста.
Радуйся, сердце милостивое стяжавый яко престол благодати;
Радуйся, яко чудодейственныя реки источивый от своея раки.
Радуйся, молитвою избавляяй от тирании страстей;
Радуйся, прикосновением исцеляяй от телесных немощей.
Радуйся, яко нищия питаваый насущным хлебом;
Радуйся, яко монашествующим уготавливаый евхаристическую трапезу.
Радуйся, Иосифе, Божией Матери любимиче блаженный.

Кондак 10

Наследник отцев был еси, преподобне Иосифе, тех последуя житию и учению, и о спасении людей попечению, непоколебимое явился еси старчества оптинскаго утверждение. С нимиже яко дерзновение ко Господу имея, проси нам согрешений прощение и спасение вопиющим Богу прославляющему святя своя: Аллилуиа.

Икос 10

Яко возделыватель богомудрый вертограда оптинскаго, цветами Духа украсил еси монашеския чины и обитель Шамординскую благоцветущу добродетельми показал еси, яко Амвросиевых дел продолжитель сый и сестер поручник, сего ради исплетошася тебе сугубыя венцы, имиже венчаем тя сице:

Радуйся, яко кедр ливанский возвысився в скиту оптинстем;
Радуйся, яко благовонный кипарис облагоухал еси монашеское сословие.
Радуйся, яко уподобивыйся маслине многим твоим милосердием;
Радуйся, яко благовонный фимиам исполнен быв богоприятным молением. Радуйся, яко росую чудес кропиши тебе молящимся;
Радуйся, от раки мощей твоих исцеления подаваяй к тебе приходящим.
Радуйся, яко благокрасный шипок обитель оптинскую украшаяй;
Радуйся, яко благодатная лоза, обитель шамординскую осеняяй.
Радуйся, Иосифе, Божией Матери любимиче блаженный.

Кондак 11

Пение ко Пресвятей Богородице приносиши, блаженне отче Иосифе, и обители твоей святей и о всех в ню приходящих и к раце мощей твоих припадающих умильно ходатайствуеши, прося мира и в благих делех благопоспешения, да получивше силу свыше, вси благочестно поют Богу: Аллилуиа.

Икос 11

Новое чудо во обретении мощей твоих явися богоблаженне старче Иосифе от земных бо недр во слове старца твоего возстал еси и чудодействовав преславными знаменьями смиренномудрием богопослушно покрываяся, темже промышленности Божию о тебе чудящися, похвальная тебе зовем:

Радуйся, яко вся отеческая хотения о тебе исполнивый;
Радуйся, крепкий послушнике воли Божией.
Радуйся, яко и по смерти послушание старцу твоему явивый;
Радуйся, яко таинственным обретением мощей твоих всех удививый.
Радуйся, яко унаследовал славу твоего старца;
Радуйся, яко чудесами божественными украсивый его честную раку.
Радуйся, нетления первый цвет явивый Оптиной пустыни;
Радуйся, благоухания исполненный крине Рая Иисусова.
Радуйся, Иосифе, Божией Матери любимиче блаженный.

Кондак 12

Покаяния изрядный проповедниче, отче Иосифе, чистоты и целомудрия изрядный рачителю, яко показавый пастве твоей образ всеприлежного о Бозе подвизания, не отрини наша моления, в расслаблении сущих, но поспешествуй твоими молитвами, да последуя тебе, бодренно зовем Богу: Аллилуиа.

Икос 12

Посещати нас от небесных высоты непрестай преподобне Иосифе, отгоня всю житейскую тесноту к Богу твоими молитвами, яко попремногу ублажаем болезни и труды твоя, яже во бдении и пощении со всеми избранниками Божия Матери всеусердне понесл еси. Сего ради благодарни суще сицевому предстательству твоему умильно зовем ти:

Радуйся, яко теснотою подвига в широту Райскую достигл еси;
Радуйся, яко от небесных высей в тесноте живущих снисходиши.
Радуйся, яко скорокрылый предстатель сый о всех тя призывающих;
Радуйся, от искушений внезапных паче чаяния избавляяй.
Радуйся, в скорбех сущих к веселию незримо приводяй;
Радуйся, сатану злоумнаго пятою смиренномудрия попираяй.
Радуйся, яко к Матери Божией приносиши наши моления;
Радуйся, яко со старцы Оптинскими вкушаеши райское веселие.
Радуйся, Иосифе, Божией Матери любимиче блаженный.

Кондак 13

О изрядный угодниче Божией Матери и теплый послушания рачителю, не презри нашей мольбы тебе, яко скорому ходатаю о нашей немощи приносимья но яви всегдашнее твое заступление избавляя нас от зол и напастей сего развращенного века, да хранимии твоим молитвенным заступлением, Богу благодаряще о всем поем: Аллилуиа.

(Этот кондак читается трижды, затем икос 1 и кондак 1)

Молитва

О Преподобне и богоносне отче наш Иосифе, старчества оптинскаго предивное украшение. Воззри на нас милостивно, к земли приверженных, и к небесней возведи вышоте.

Яко велие дерзновение ко Всемилостивому Владыце стяжавый, и Пресвятая Богородицы посещения сподобивыйся.

Молися богоблаженне отче, в любви и непорочности нам на земли пожити, страсти плотския попати и добродетельный прекрасный венец постническим и любомудрым житием себе соплетати.

Ты убо ведаешь отче, коль опасно есть в вынешнем веле разслабленно жити, идеже соблазны, расколы яко волцы хищницы стадо Христово расхищают.

Темже убо отче испроси нам в вере правой до смерти пребывати и предания свытых отец со опастством хранити. Да внутрь двора Церкви Христовой пребудем, благодатию хранимии Всесвятаго Духа и твоим заступлением.

Ей, отче, моли и Матерь Света Пресвятую Богородицу, да не оставит нас сирими егда душою будем разлучени от тела сего брэннаго, но да проводит нас безбедно мимо горьких мытарств испытания ко Престолу Всемилостиваго Сына Своего, Ему же поклонение и славу возсылаем, со Безначальным Его Отцем и Пресвятым и Благим и Животворящим Его Духом, ныне и присно, и во веки веков. Аминь.